

Gui'ch yaloj guxhaal San Pabl loj Timoteo

Rugajpdioz Pab Timoteo

1 Naj Pab, najn tijb xiapóstol Jesucrist por xguialrniabee Dios bèn rüjn perdon dux tol ree në por Jesucrist bèn rayagbee ree gui't stijb. ²Cucan gui'ch guie par lüj Timoteo, din par naj lüj naj zi'cgajc da xi'nän guial tiblojzi raliduladx Jesucrist. Dux Dad ree Dios në Dad Jesucrist güünle' lüj, yayaman lüj yabe'cdxe tëëman luxdool.

Rëb Pab loj Timoteo xcwent ree bèn rusquiee

³Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chitëë rulüü reeman bejn ree ni ad najt diidxli. ⁴Ad chililadx reeman ni rbëëguijc ree bejn, ad guidxga' tëë reeman ban za reeman, o chu rajc reeman xbengol gulal reeman, din ad ni guint ree gagnë laa reeman par gusnuu chililadx reeman xtiidx Dios.

⁵Canabeen lüj din güün reeman zian din guiguien guial diidxli rën lasa' reeman, achet naladx reeman din guiguien tëë guial guidib luxdoo reeman rililadx reeman

xtiidx Dios. ⁶Din yu' reeman ad rüjntri zian guial ganax ree ni ren ni ad rüjnt ree sirv rü reeman.

⁷Rën reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rën guiëb ni rniece reeman ni'quid rignia't reeman ni naladx reeman naj zagdx culüü reeman bejn ree.

⁸Dunuj ree rayagbee guial zagdx naj ley guin par bèn rignia' xhie sirv rüjnan. ⁹Abi' rayagbee ree guial ad baneet Dios ley guin par ree bèn naban xnejz niz lojman, baneeman ley guin par tëd ree bejn casti, bèn naban ree zi'ctzi naj xixgab reeman, bèn ad ruzoobt ree diidx, bèn ad yu'guijct ree Dios, bèn rüjn ree dol, bèn ad rajpt ree Dios respejt, bèn ad rüjnt ree naguiejn guiën reeman Dios, bèn rugüjt xdad xniala, në par gra ree bèn rugüjt bejn, ¹⁰rüjn tëën sirv par xcasti ree bèn za'në xingüiaaw o búngunaa ren, par ree xin ruladx lasa' xingüiaaw gajc o búngunaa ruladx lasa' búngunaa gajc, në par ree bèn rban bejn ree par guto' reeman laa reeman zi'c mojs, nëtëë par ree bèn rusquiee në ree bèn ruza't Dios par sudxi'chnë

xgualrusquiee reeman në par gra ree bën rüjn xcontr ni naj diidxli.

¹¹Diidxli guie ree naj ni zëed ree loj xtiidxza'cdxoon Jesucrist. Dux Dad ree Dios, bën rayal respejt, laaman naj bën basa'nnë naj diidx guin ree din gatiechan laa reen.

Xhienaag baya Dios Pab

¹²Quixtëe Dad Jesucrist laaman cayagnë naj, rajp tëëman naj confianz abi' bacaabeeman naj par gatiechan xtiidxaman, ¹³majsi yaloj gunen laaman diidxguijdx abi' guzunaalan bën rililadx ree laaman din gūnan laa reeman ni mal abi' dād naya bennë'n laa reeman. Per Dios bayaman naj guial ad bignia'tan ni cayūnan din gad naj chililadx Jesucrist. ¹⁴Abi' dād benza'c gojcaman con naj, balüüman naj xhienaag chililadxan balüü tëëman xhienaag guiënan Dad Jesucrist.

¹⁵Diidxli ni ganin lëjt, rayal chililadx bejn: guial Jesucrist bi't loj guidxliuj par gūnman xtol bejn perdon, abi' loj gra ree bejn naj naj mazri bëndol. ¹⁶Per majsi najn mazri bëndol, baya Dios naj abi' gojp Jesucrist naj pacens din gagbee ree bën chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblayaa con Dios. ¹⁷Zeel zianczi rayal yaya'p reeman respejt yaza't tëë reeman zagdxe guial najman rey bën ad yu't dxej guiët, abi' rajpaman guialrniabee par tiblayaa guial tijbzi laaman naj Dios abi' achut rajc ruguiaa laaman. Amën.

¹⁸Timoteo, par naj lüj naj zi'c da xi'n'an zeel rnin lüj been zi'c gunee

reeman xcwentil diidz yaloj, abi' zi'c tijb suldad ni rej loj wadijl ad guidxebil niz loj ree bën za' ree contr xtiidx Dios. ¹⁹Guzudxi'ch loj ni rililadxil Jesucrist, been tëë ganaxzi ree xgab zagdxe par gūünl zi'c rayal. Din yu' ree bejn guial ad rüjnt reeman zian, yan ma banijt reeman ni rililadx reeman Dios.

²⁰Zian ma guzajc ree Himeneo con Lejandr, zeel ma bayūn laa reeman loj satanás din gusiid reeman guial ad rayalt guiniee reeman Dios diidguijdx.

Xhienaag cwedx guiniab bejn Dios

2 Yalojdoo ni rnin lojdi naj guial cwedx guiniabidi Dios, cwedx guiniabidi laaman por gra ree bénguidxliuj, gudëed tëëdi quixtëe lojman. ²Rayal yarejdx yanaab ree Dios por ree rey në por gra ree guxtis loj guidxliuj din chile' yabajn ree zagdxe gusnuu tëë yabajn ree zi'c rën Dios. ³Din laan naj ni zagdxe ni rayuladx tëë dux Dad ree Dios, bën rüjn perdon dux tol ree, ⁴bën rën guial gra bejn gac perdon guidxin tëë dxej gagbee bejn xhie rën guiëb xtiidxliiman. ⁵Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bénguidxliuj. ⁶Güjtaman loj crüjz persi gudijxaman por xtol gra ree bénguidxliuj, zian naj ni balüü Dios bejn chi bidxin dxej bacaabeeman gac zian. ⁷Zeel bacaabeeman naj gacan xi apóstol Jesucrist din gatiechan xtiidxaman, në par gusidan bën ad najt ree bën Israel conin naj diidxli, xhie tëë naag

chililadx reeman Jesucrist, walin ad rusquieetan.

⁸Yan rēnan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guialrdxe'ch nē sin wadijl. ⁹Rēn tēen guial ree bēngunaa su reeman zi'c rayal, ad tēdlaj suchaaw reeman con or, nē ree perl nē ree vistid zagdxe o guial tēdlaj güünchaaw guidxguijc reeman. ¹⁰Din mazri zagdxe güün reeman ni naj zagdxe, zi'c rayal güün ree bēngunaa ni ma zinal xnejz Dios. ¹¹Abi' rayal gucaagdiajzgi reeman ache guiniee reeman chi rulüü ree xinguaaw xtiidx Dios. ¹²Din ad zatiēēbtan guial gulüü tijb bēngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee bēngunaa xinguaaw, rayal gucaagdiajgzaman. ¹³Din Dios, yaloj Adán beenchaawaman, dxelri Eva. ¹⁴Din ad Adánt basquiee reeman, yaloj Eva basquiee reeman, abi' por guialrusquiee guin beenman dol. ¹⁵Per zajc gac bēngunaa perdon, bal güün xchiinman zagdxe guial najman na, bal gusnuu chililadxaman Dios, guienman bejn ree guiban tēeman xnejz.

Xhienaag guiban ree bēn rniabee

3 Gol badxe'guijc da diidxan: Bal chu bēn rēn gap guialrniabee loj gra ree bēn rliladx Jesucrist par gulüüman laa reeman xnejz Dios, zagdxequi naj ni rēnman güünman. ²Per bēn rajp guialrniabee guin rayal güünman zi'c rayal chitēē chu guinieeguijdx

laaman. Rayal chu' tijbzi lacheelaman, guibanman zagdxe chu' tēē xquiarguiejnman din gap ree bejn laaman respejt. Gacaman benza'c con ree bēn rdxin lidxaman, gac tēēman tijb bēn rignia' par gulüüman bejn ree. ³Ad rayalt gacaman bengui', ni'qui bēn rguuil wadijl ad rayal tēēt yaguuilaman mod par tia'man xmilia ree bejn, rayal gacaman benza'c con chutēēz, gac tēēman bēn naxanladx ad zazēēbladx tēētaman milia. ⁴Rayal nabee lidxaman zi'c rayal din gulüü ree xi'nman xhienaag gap reex respejt guzoob tēē reex diidx. ⁵Din bal id rajc rniabee lidxaman, ÷xhieza naag nabeeman bēn rliladx ree Jesucrist? ⁶Zeel tijb bēn qui guzulojri rliladx Jesucrist, ad rayalt nabeeman loj ree bēn ma rliladx chitēē guilies xvalor gajcaman abi' yayalaman lasa' casti ni bayal xindxab. ⁷Bēn rajp guialrniabee guin xt ree bēn ad rliladxt Jesucrist rayal güünbee laaman guial najcaman benza'c chitēē yaya'nxtuman abi' güün xindxab laaman gan.

Ni güün ree bēn rüjn yudar bēn rniabee ree

⁸Yan ziangajc ree bēn ma cwabee par güün reeman yudar bēn rniabee ree, rayal güün reeman zi'c rayal din gap ree bejn laa reeman respejt, güün cumplid xtiidx reeman, ad guiē' tēē reeman, ad yaguuil tēē reeman mod par tia' reeman xmilia ree bejn. ⁹Con xgabza'c chinal reeman ni ma balüü Dios dunuj ree. ¹⁰Zeel yalojxgaj rayal gac reeman prueb abi' bal id xhie xfalt reeman, dxel ma zile' guzuj

bejn laa reeman din güün reeman yudar b́en rniabee ree. ¹¹Ziangajc ree b́engunaa ni ma cwabee par güün reeman yudar, rayal güün reeman zi'c rayal din gap bejn laa reeman respejt ad zaneeguijdx reeman bejn, rayal guiban reeman zagdxe abi' güün cumplid xtiidx reeman. ¹²Abi' ree xinguaaw cwabee guin par güün reex yudar b́en rniabee loj ree xbejn Cristo, tijbzi lacheel reex rayal chu', nabee t́e lidx reex con xi'n reex zi'c rayal. ¹³Din b́en ŕijn ree sirv zi'c rayal ad respejtzi rajp bejn laa reeman, sin guialrdxeb ma zile' guiéb reeman xhienaag rliladx reeman Jesucrist.

Naroor naj b́en raliduladx ree

¹⁴Gagné Dios chile' guialan guidganan ĺij. Per cucan gui'ch guie, ¹⁵din bal gaglaan ma ragbeel xhienaag guiban bejn delant loj los demasri ree xbejn Dios, b́en ma naj ree xbejn Dios naban, abi' za'dxi'ch reeman rulüü t́e reeman xtiidxliman. ¹⁶Dunuj ree rayagbee guial dád b́en naroor najman, b́en raliduladx ree:

Bi'taman loj guidxliuj zi'c tijb b́enguidxliuj,
rëb xSprijt Dios guial laaman naj b́en naya
abi' baguiaa ree anjl laaman bi'taman loj guidxliuj.
Bre'ch xtiidxaman loj ree b́en ad najt b́en Israel,
guidibczi bililadx bejn laaman abi' baca' Dios laaman xanyabaa.

B́en rusa'n ree guialrliladx reeman Jesucrist

4 Ma bagojnchaaw xSprijt Dios guial źeéd ree dxej ni yu' ree

bejn gusa'n guialrliladx reeman Jesucrist, mazri guidxga' reeman xtiidx ree b́erusquiee ńe gra ree ni źeéd por xindxab. ²Mazri guidxga' reeman b́erusquiee ree, b́en wed ŕijnz ree, b́en achetri ree rzajc guial ŕijn reeman dol din ma naya' reeman zian. ³Guiéb reeman guial ad najt guial guxhliaa ree bejn ad zajw t́eét reeman graloj. Per Dios badxe' graloj guialraw par gaw ree b́en rliladx laaman, b́en ma ragbee ree conin naj diidxli abi' gudééd reeman quixt́e lojman. ⁴Din gra ni badxe' Dios naj zagdxe, achet ni rayal cwexuu bejn tia'man bal gudéeman quixt́e chi cayawaman laan. ⁵Din chi rarejdx ranaab ree Dios con xtiidxaman ŕijnle'man guijc ni yadaaw ree.

B́en ŕijn sirv zagdxe loj Jesucrist

⁶Zeel bal rulüül b́en rliladx ree Jesucrist zi'c ma rnin, dxel cayújnquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx guin ńe ree diidxza'c ni zinalil. ⁷Per ad guidxga'l ni rb́eéguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c ŕen Dios. ⁸Zagdxe naj par güün bejn graloj ejercijs par gacaman gojl, per loj gra xhietéeznin mazri lasajc guiban bejn zi'c ŕen Dios. Din ad lojtzi guidxliuj guie güün sirv guial naban bejn zi'c ŕen Dios, ńegajc xanyabaa lod gap bejn guialnaban tiblyaaa. ⁹Dunuj ree rayagbee guial ni diidxli naj ree diidx guie, abi' rayal chililadx gra bejn laan. ¹⁰Zeel majsí cayza'can ni cayza'can,

per cayguieenan ni cayguieenan guial raliduladxan Dios naban, bén naban par güünman yudar gra ree bejn, per mazri bén rlliladx ree laaman.

¹¹Zian rayal gusiidil bejn ree güjdx tää loj reeman din güün reeman zian. ¹²Gojp cudad chitää guiëb ree bejn guial achet sirv lüj guial ad wayajctil bengol. Mejorli been naguiejn din gaquil tijb ejempl par ree bén rlliladx Jesucrist, zi'c xhienaag rül diidx, zi'c nabanl, zi'c rënln ben ren ree, zi'c rlliladxil Dios nētää por ree xixgabza'quil. ¹³La'tgaj guialan, basnuu biil xtiidx Dios loj ree bejn, guneenë reeman balüü tää reeman xhie rën guiëb xtiidx Dios. ¹⁴Ad yayanladxil güünl zi'c rayal güünl por quiarguejn ni banee Dios lojl chi badxiib yaa ree bengol guijquil chi gogbee reeman guial lüj naj Bén gule Dios.

¹⁵Badxe'guijc diidx guie ree din gagbee gra ree bejn guial cusnuu zël delant. ¹⁶Gojp lüj con ni rusiidil bejn ree. Guzujdxi'ch loj ni ma ragbeel, zian yabëë lüj gajc loj casti yabëë tää ben cucaagdiaj ree xtiidxil.

Xhienaag güün Timoteo con ree Bén rlliladx Jesucrist

5 Ad tilnël tijb bengol, badëëman consejw zi'cgajc xdadil, abi' xin naj ree xinguiag, badëë reex consejw zi'cgajc bijchil. ²Ziangajc béngunaa bengol ree badëë reeman consejw zi'cgajc xniaal, abi' biinguiag ree, badëë reem consejw zi'cgajc bizanl con xgabza'c.

³Bidxga' ree béngunaa bizëjb ni diidxli achut rajp. ⁴Per bal

tijb béngunaa bizëjb guin yu' ree xi'n o xiajg, dxel yalaj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdxë, zian tää ruladx Dios. ⁵Béngunaa naj diidxli Bén bizëjb, Bén ad rajptri chunin loj guidxliuj guie, tijbzi Dios naj Bén yu'guijcaman güün laaman yudar dxel ad rucwëëzt rbejdx rniabaman laaman dxëj guiaal. ⁶Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. ⁷Bagojn gra ree diidx guie Bén ma rlliladx ree Jesucrist chitää chu guinieeguijdx laa reeman. ⁸Din Bén ad rüjnt yudar xcompniar, abi' ni'qui xfamilaman Bén zojb ree lidxaman ad rüjntaman yudar, laaman ma basa'n ni rlliladxaman abi' piorli najman guial loj ree Bén ad rlliladxt Jesucrist.

⁹Ad tia'l laj chutëëz béngunaa bizëjb par gac reeman yudar, naabzi ree béngunaa bizëjb Bén ma nadëd ree gayojn ijz abi' ad guzunëtaman ben ren la'tgaj naban lacheelaman. ¹⁰Bal nünbee tää ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëë lidxaman baya'n ree bejn bal gojcaman benza'c con ree Bén rlliladx Jesucrist Bén bidxin ree lidxaman, bal beenman yudar Bén rzagdiaj ree, bal been tääman naguiejn beenman ganax ni zagdxë.

¹¹Per ad tia'l laj ree béngunaa bizëjb benguiag ree, din despuejs rën reeman guxhliiaa reeman abi' ad rüjntri reeman ni rayal güün

reeman por Cristo guial rën reeman guxhliaa reeman stijb. ¹²Dxel rüjn reeman dol guial ad rüjntri reeman ni ma been reeman compromis con Cristo. ¹³Abi' tää ree benguiag guin zë reeman yu yu, zianz rajc reeman costumbr achetczy rüjn reeman. Abi' ad laatzan, rzuloj ruza't reeman bejn, ru reeman loj xhietëeznin abi' rniee reeman ni ad rayalt guiniee reeman. ¹⁴Zeel rënan guial bën naj ree béngunaa bizëjb benguiag, mejorli guxhliaa reeman stijb, chu' xi'n reeman nabee tää lidx reeman zi'c rayal, chitëë gudëed reeman mod guinieeguijdx ree bën ralen ree dunuj ree laa reeman. ¹⁵Din yu' ree béngunaa bizëjb ma guro'nladx reeman xnejz Dios abi' ma zinal reeman xnejz xindxab.

¹⁶Abi' bal tijb bën rliladx Jesucrist naj xfamilaman tijb bën baya'n bizëjb, dxel laaman rayal güün yudar béngunaa bizëjb guin chitëë gacan mazri carg par ree dux compniar ree bën rliladx ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

¹⁷Bën rliladx ree Jesucrist rayal gap reeman respejt bën rniabee laa reeman në ree bën rniee ruluü tää xtiidx Dios zi'c rayal, gudëe täädi loj reeman gra ni ryaadx reeman. ¹⁸Din loj xtiidx Dios rëb: “Ad gudxe'di guijxh ro' ree begui'xh la'tgaj cayüjn reeb dxiiin”, rëb tää loj xtiidx Dios: “Rayal gax bën rüjn dxiiin”.

¹⁹Ad guidxga'di ni rudxiib ree bejn guijc tijb ree bën rniabee ree bën rliladx Jesucrist, bal id yu' tio'p choon ree bejn rëb guial

diidxli naj ni rniee reeman por laaman. ²⁰Per bal tijb bën ma ca' guialrniabee rusnuu rüjnman dol, rayal guinieenël laaman delant loj gra reeman din guidxeb los demazri reeman.

²¹Yan por Dios, por Jesucrist në por ree anjl ni ma gulejman, naj rni badxe'guijc been tää zi'c ma rnin ad cwel loj ree bejn, tiblojzi been con gra reeman. ²²Gojp cudad cwel tijb bën ni nabee din ad ragbeetil bal yu' ni mal cayüjnman, dxel güün ree bejn xgab guial nëgajc liuj ruladx ni cayüjnman. Gojp cudad graloj ree dol.

²³Në guial guië't guië't ragxuu lënl guial ad nadaant lënl, ad rë'l nijs lagajzi mejorli gu' tibda'n vin.

²⁴Yu' reeman laa rguien gajc xhie dol cayüjn reeman diidz chi gad reeman gudëed cwent loj Dios, per yu' reeman ad rguient xhie dol cayüjn reeman xt chi yadëed reeman cwent loj Dios. ²⁵Ziangajc yu' ree bën ni laa rguien gajc ni zagdxe ni cayüjn reeman, abi' yu' reeman ni'quid rguient ni zagdxe ni cayüjn reeman, per yu' dxej gagbee ree bejn laan.

6 Gra ree mojs rayal gap reeman respejt xpatron reeman chitëë chu guiniee diidxguijdx contr Dios o contr xtiidxaman ni caylüün. ²Abi' bal rliladx patron guin Jesucrist dxel rayal gap reeman laaman mazri respejt guial nëman rliladx Jesucrist zi'cgajc laa reeman. Abi' tää rayal güün xchiin reeman zi'c rayal guial cayüjn reeman sirv tijb xcompniar reeman bën rliladx Jesucrist compniar ni rën reeman.

Zian balüü ree bejn güjdx tëë loj reeman din güün reeman zian.

Guialnaza'c ni naj diidxli

³Bal yu' bén rulüü diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulüütaman bejn ree, ⁴najzaman bendxal. Din ruladxaman tildiidxaman abi' ni'quid xnejzt rnieeman, dxel ni zëéd guialnadëdloj, guial rdxe'ch, guial rniee diidxgüjdx abi' ad riladxtri lasa' reeman, ⁵ad rucwëézt rdil reeman por ree ni ad rüjnt sirv ni yu' güjcx reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bén naj ree zian, biquied loj reeman. ⁶Dad ben rijcw naj bejn chi ma riladxaman Jesucrist, per bén za' conform con ni rajptzaman. ⁷Din achet budnë' ree loj guidxliuj ache tëët zajc yunë' ree chi yayëjt ree. ⁸Bal raya'p ree ni yadaaw ree në lajd ni yadojt ree con laan rayal yaya'n ree conform. ⁹Per ree bén rzëébladx gac reeman rijcw loj guidxliuj guie ad rilet' sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman. ¹⁰Din guial rzëébladx milia laan naj xliuj gra ni mal. Abi' yu' reeman por guialrzëébladx guin ma basa'n reeman ni riladx reeman Dios abi' laagajc reeman cusagdiaj laa reeman.

Ni rayal güün Timoteo

¹¹Per lüj Timoteo, xbejn Dios, briica loj ree ni mal guin. Been naguiejn guibanl zagdx, guibanl

zi'c rën Dios, bililadxaman, gojc bén naxanladx, gojp pacens güyën tëë ree ben ren. ¹²Been da't naguiejn guzudxi'ch loj ni riladxil xtiidx Jesucrist. Ad gusëebil guialnaban ni naj guialnaban tiblayaa, din par zian gulejman lüj abi' rëbil delant loj zien ree bejn xhienaag riladxil Jesucrist. ¹³Yan, por Dios bén razaladx guialnaban loj gra ni yu' loj guidxliuj në por Jesucrist bén ni gunee sin guialrdxeb loj Poncio Pilato, naj rniabee lüj ¹⁴din guzobil diidx güünl ni rnin lojl, sin guial guchaal xhienin chitëë guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. ¹⁵Gui'taman dxej ni nabee Dios gui'taman, Dios bén rayal respejt bén naj tijbzi Dios rajp tëëman gra guialrniabee, bén naj xrey ree rey naj tëëman xDad ree dad. ¹⁶Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc tëët guguiaa bejn laaman. iPar laaman naj respejt në guialrniabee par tiblayaa! Amén. ¹⁷Bén naj ree benrijcw loj guidxliuj guie, güjdx loj reeman ad güün reeman benro' ad cu'güjcx tëë reeman guial ni rajp reeman najn par tiblayaa, din guialnaza'c ni rajp bejn yu' dxej yaran. Mejorli cu'güjcx reeman Dios bén naban din laaman razaladx da't dunuj ree graloj din chu' du luxdoo ree nix. ¹⁸Güjdx loj reeman din güün reeman ni zagdx, güün reeman zien ree ni rüjn sirv, cu' tëë luxdoo reeman zagdx güün reeman yudar bénprob ree. ¹⁹Abi' zian guto'p reeman guialnaza'c

ni güün laa reeman yudar loj ree
dxej ni zëéd din yayal reeman
guialnaban tiblyaa xanyabaa.

Xconsejw Pab

²⁰Timoteo, badxe'guijc ni rayal
güünl, Ad guidxga'l diidxdxuudx
ree xcwent ree ni ad rüjnt ree sirv,

ni'qui ree diidx rusquiee, ni'qui
ree diidx ni rü ree bén ni naladx
guial rajc da't reeman abi'za
ad walit ni rajc reeman. ²¹Din
yu' ree bén rüjn zian yan, abi'
ma basa'n reeman guialrliladx
reeman Dios.

Dios güünle' lüj Timoteo. Amén.